

**Akileraaruserinermik ingerlatsineq pillugu Inatsisartut inatsisaata nr. 11, 2. november 2006-imeersup allanngortinneqarneranik Inatsisartut inatsisaat nr. 11, 1. juni 2017-imeersoq (Akileraaruseriffiup aamma Naalakkersuisut oqartussaaffiunik agguataarineq il.il.)**

**§ 1**

Akileraaruserinermik ingerlatsineq pillugu Inatsisartut inatsisaanni nr. 11, 2. november 2006-imeersumi, Inatsisartut inatsisaatigut nr. 32, 28. november 2016-imeersukkut kingullermik allanngortinneqartumi makku allannguutigittinneqarput:

1. § 18-*ip* kingornanut ilanngunneqarpoq:

”§ 18 a. Nioqqutissanik tunisaqarnermi imaluunniit sullissinermi akiligassat allagartaannik suliaqartarnissamik piunasaqaatit Naalakkersuisut maleruagassiuussinavaat, matumani aamma akileraarutitigut ilanngaateqarnissap, akiligassat allagartaat pillugit piunasaqaatit annertuumik sumiginarneqartillugit akileraaruseriffimmit itigartitsissutigineqarsinnaanera pillugu aalajangersakkat aalajangersarsinnaallugit.”

2. § 25, *imm. 4*, ima oqaasertaqarpoq:

”*Imm. 4*. Akileraarutit sippuutaat taartisiallu ukiumi akileraarusiiffimmi ulloq 1. september naller-tinnagu utertinneqassapput. Utertitsineq ulloq 1. septemberimi kingusinnerusukkulluunniit pippat akileraarutissaatitaasoq § 44, *imm. 4*-mi maleruagassaq malillugu erniasiaqartinneqassaaq.”

3. § 25, *imm. 5*, oqaaseqatigiit pingajuanni allaqqasoq ”§ 24, *imm. 5*” allanngortinneqarpoq ima: ”§ 24, *imm. 4*”.

4. § 39, *imm. 1*, ima oqaasertaqarpoq:

”Soraarnerussutisiaqarnissamut aningaasaateqarfiit, inuunermut soraarnerussutisiaqarnissamullu sillimmasiisarfiit, aningaaseriviit allallu soraarnerussutisianik imaluunniit sillimmasiissutinik inuuneq naallugu pisartagaritinneqartussanik tunniussisartut akileraaruseriffimmut makku pillugit paasissutissiissapput:

- 1) akileeqataassutit akiliutillu akilerneqarsimasut,
- 2) soraarnerussutisiaqarnissamut aaqqissuussinernit, aningaasarsianit akileraarutit pillugit Inatsisartut inatsisaanni §§ 39-mi, 39 a-mi, 40-mi aamma § 47 f-imi taaneqartunit tunniunneqartartut,
- 3) aaqqissuussinernit taamaattunit aninermi ajunngitsorsiatut, utertitsinermi nalingatut aamma bonusitut tunniunneqartut, aamma
- 4) aalajangikkat Inatsisartut inatsisaanni § 46, *imm. 2*-mi taaneqartut ittit, soraarnerussutisiaqarnissamut aningaasaateqarfiup, inuunermut soraarnerussutisiaqarnissamullu sillimmasiisarfiup, aningaaseriviulluunniit allalluunniit ilisimasaqarfigisaat.”

5. § 76-ip kingornagut aamma **immikkoortoq VII**-ip siornagut kapitalitut nutaatut ilanngunneqarpoq:

”Kapitali 17 a

*Oqartussa qarfimmu allamut maalaaruteqarneq – aalajangiinermik naammagittaalliuteqarneq*

§ 76 a. § 1 naapertorlugu akileraaruserinermut ingerlatsiviup oqartussaaffigisaani aalajangernerit, § 2 naapertorlugu suliat Skatterådimut maalaarutigineqarsinnaagaangata, allaffissornermi oqartussa qarfimmu allamut naammagittaalliutigineqarsinnaanngillat. Tamanna aalajangernerup pisinnaatitsineq naapertorlugu pisimagaluaaraangalluunniit atuuppoq.

*Imm. 2.* Akileraaruseriffiup sulisunut tunngatillugu suliassani, arsaarinnissuteqarnissaq pineqaatisiinissarlunniit pillugit suliassani aalajangiinermi kiisalu allagaatinik takunnissinnaatitaaneq pillugu aalajangiinermi allaffissornikkut oqartussaasumut allamut maalaarutigineqarsinnaanngillat.”

§ 2

Inatsisartut inatsisaat ulloq 1. januar 2018 atortuulissaaq.

*Namminersorlutik Oqartussat, ulloq 1. juni 2017*



Kim Kielsen